

Tico Croes

OTRO EXPRESION RIDICULO DI PROMER MINISTRO

ORANJESTAD(AAN) -- Parlamentario Tico Croes a duna di conoce na DIARIO cu un persona cu bira Promer Ministro di un pais mester tene cuenta cu e tin un responsabilidad pa cumpli cune.

Parti di e responsabilidad aki ta cu e mester ta sincero cu e pueblo cu a deposita su confianza den dje.

Ta pesey Promer Ministro Oduber no por critica algo, esta e garantianan, mientras cu e mesa vota na favor di e garantianan, sobra ta cumbinie politicamente.

Segun Croes, tempo cu Oduber tabata lider di fraccion di MEP, henter su fraccion a vota na favor di e garantianan y hasta su fraccion a elogia e garantianan.

E notulen di e reunionan publico ta bon cla den esaki. Croes ta haya cu ta un lastima cu Promer Ministro Oduber no kier carga su responsabilidad y ta usa mentira flagrante pa mustra su mala fe.

Mas ainda awor cu a keda demostra cu e no por ningun excuus pa husticia su voto na favor di e garantianan, pasobra a keda proba cu e y su fraccion tabata tin den nan poder e carta di dia 3 di Maart 1987 di presidente di Banco Central.

Croes a señala cu Promer Ministro pa tapa su berguenza cu a gare ta gaña atrobe, ta para bira emocional y onsportief.

Segun Croes, Oduber ta declara cu un representante legitimamente eligi mester keda keto tocante garantianan a worde discuti.

Croes a splica cu e hecho cu e ta cuestiona Oduber pa su argumentonan y hasta a acuse di ta gaña, a pone cu Oduber den su reaccion riba e acusacion a bisa cu Croes ta lastra garoshi.

Croes a señala cu riba e acusacion mes, Oduber a keda keto y ta sigui purba hustifica cu MEP y su persona a vota na favor di tur garantia cu awor nan ta

critica.

Croes ta haya cu ta un lastima cu Aruba tin un Promer Ministro asina. El a remarca cu pasobra e argumento cu e no tabata tey na momento di discusion di e garantianan den Parlamento, ta pesey e no por papia tocante garantia ta ridiculo y ta causa hilaridad.

Segun Croes, den un solo rosea Oduber no solamente ta purba kita Croes su derecho di papia pero tambe di siete di su miembronan den fraccion di MEP cu actualmente ta den Staten.

Croes ta puntra: "Acaso mi no por papia di e 340 Miyon cu a somenta pasobra mi no tabata tey den sala di Parlamento? Acaso pasobra mi no tabata miembro di Parlamento na ora cu e 340 Miyon a disparce, ami tambe mescos cu henter pueblo no a sinti e 8.2 %?"

Segun Croes, esaki so caba ta dune e derecho como ciudadano pa papia ariba e abuso, mentira y in-husticia cu a worde comete contra tur hende na 1985.

Awor como Parlamentario eligi door di pueblo, segun Croes no solamente e tin e derecho pero tambe e deber pa controla Gobierno y door di esey ta su obligacion pa repasa tur documento pa pone su mes na haltura di loke a pasa y ta pasando.

Segun Croes, e hecho cu e por lesa ta pone descubri con Promer Ministro ta purba di gaña constantemente y cada biaha cu Croes descubri esaki ta su deber pa comparti e informacion aki cu e comunidad cu mester sirbi como su representante.

E ta puntra su mes, con Oduber sa con halto Hooiberg ta? Croes no ta kere cu Oduber personal-

mente a bay midi e haltura di Hooiberg, sino el a usa su facultad pa lesa pa por informa su mes for bukinan y documentonan.

E asunto di garantia ta un asunto completamente di mala fe pa parti di Gabinete Oduber. Promer Mnistro Oduber ta critica garantia, ata su mes Gobierno ta duna un garantia di alrededor di 20 Miyon na Ramada.

Segun Croes, e diferencia entre e Gobierno anterior di AVP y esun di Oduber ta cu AVP ta vota contra ora ta kere cu algo ta malo pa Aruba.

AVP no ta vota na favor di algo y djei bin critike. Tampoco AVP no ta yora henter ora, pero ta traha pa soluciona problema.

Un ehemplo di esaki ta e proyecto Golden Tulip. Croes a señala cu Oduber mes ta acepta recientemente cu e garantia cu el a firma di Golden Tulip ta esun peor cu Aruba conoce.

AVP tabata sa esaki for e promer dia cu a cuminsa goberna e pais. Pero AVP no a sinta yora sino a traha ariba e proyecto aki.

A cuminsa promove Golden Tulip, a logra cu Golden Tulip pa promer biaha a gana placa y den algun luna despues di esaki a logra cu un grupo Japonés a ofrece pa refinancia cu nobenta Miyon Florin henter e proyecto di Golden Tulip, eliminando asina e garantia aki.

Pakico Promer Ministro no a acepta e refinanciamiento aki? Croes ta kere cu esaki Oduber mester splica pueblo. Maske mes con liher un mentira ta, berdad semper lo alcance.

Croes a duna di conoce cu e lo reacciona apart riba e asunto di lastramento di garoshi.

TA HUUR

BETON MOLEN

YAMA NOS NA 48770

